

大般若經第二會序

唐西明寺沙門玄則製

觀夫委契中道。據妙軌於無垠。流賞一歸。漾玄津於有截。何嘗不首情而汲悟。卽事以排疑。疑繁而誨自廣。悟初而訪逾篤。所以重指鷲阿。再扣龍衆。慧命相聚。則善現居宗。法忍爲羣。則妙祥端首。旣而搖區示警。闢寓開嚴。舌掩大千。身分巨億。光汎慈影。而六趣霑和。聲颺法言。而十方動訊。旣駭殊觀。方希秘獎。或謂迹高類誕。情昏仁析。故嘗言曰。殉蠡管之察。大病高深。執螻菌之辰。終欺歲祀。夫以淺定微術。猶擅五

通。小善片言。實應千里。況挺孕羣品。彈厭眾靈。萬期一會。窮冥極遠。是使微塵刹土。不動而遊。恆沙諸佛。不謀而證。非般若至蹟。其孰能致此。是用十空瑩曬。七如朗聽。雖惱趣森橫。寂岸層迴。莫不同幻藥之開落。不滅不生。比夢象之妍蚩。無染無淨。焱谷投響。則譽毀共銷。月池寢色。則物我俱謝。文優理詣。感通悟永。凡有八十五品。七十八卷。卽舊大品光讚放光。然大品之於光讚。詞倍豐而加美。卽明此分之於大品。文益具而彌正。攢輝校寶。豈不盛歟。